

四庫全書

集部

欽定四庫全書

石倉歷代詩選卷四百十

明 曹學佺 編

明詩次集四十四

石珪

遠遊

君之出矣遊如之何朝覽冀野夜宿滹沱帝子不逢中
流揚歌高鳥墮林游鱗溯波曷發崑崙曷濯洧盤禾黍

蔽野童欣耄歡新聲在梁清酒在尊聊以永日以抒憂
煩

擬古

秋夜何迢迢蟋蟀鳴陰壁蟾升林薄見露下庭宇聞螢
火寒依人羸駒倦嘶櫪開襟納虛明萬事謝欣戚

古別離曲

官楊何青青野花明道傍妾東君向西坐見道路長留
妾千金刀贈君雙明璫日月如流星歲暮未相望

雜詩

涼風動書幔彷彿西南來
庭柯下露華哽咽遞相催
水蔓滯宿雨裊裊蒙塵埃
草蟲階下鳴流螢亦徘徊
坐感歲事速忽如車輪推
門前有層城層城復高臺
乘風欲登眺仰邈天漢迴
帝子不可見青鳥非良媒
中夜耿深憂淚落生秋苔

逢太原故人

浮生忽飄轉忽如車轂塵
與子十年別念君如舊貧
感

慨奏詩篇况復留陽春為問城中景一一及交親白壁
猶待價巨魚多戢鱗昔時富遊子忽為寒乞身荒蕪積
水處時見紅樓新賤子負干戈依然羈旅人遭逢太平
年幸免罹苦辛感此人事變對談忽忘真

秋夜

蕭蕭暮秋意似與騷人期西風淒布袍河漢影垂垂高
城奏清角感愴有餘悲故壘欲辭燕殘蟬猶附枝烹羊
及烹羔農家欣及時不念抱窮士文章光陸離忽觸秋

濤聲壯懷良在茲

飲鮑文瑞莊居

城柳初盡處薄藹開空明潦降古洲出千里關寸情斷
岸帶芳草遠樹啼殘鶯釣艇日往還或有羊裘生下馬
對尊尊故人相與傾坐久出歌舞柔風濯長纓落霞紺
野色吟蛩戰秋聲長恐西日下衢路立屏營

秋夜

涼夜始多夢升沈頃相尋蟋蟀入牀下蕭序已載陰寒

裳出庭戶河漢清且深華月掛林杪高鴻送哀音百歲
豈不多半為風雨侵嗟彼蝸角名煩此孤鶴心流水激
方洲高山出遠岑子期果難逢獨卧枕素琴

寄所知

昨夜清颼發懷君在遠道雙魚不可託寂莫對荒草寒
露日夕凝林麓霜苦早誰念裘褐單泥滓難自保百年
會有樂中歲已枯槁如何日孳孳復為毫末惱濁酒幸
滿樽藜藿亦堪飽同心盍來歸盤桓以怡老

五月朔日獨坐

風日乍炎燠坐睹麥秋暮青山當戶牖黃塵滿岐路旅
舍亦宏敞夕陰舞嘉樹羈鳥恒思歸舉翼未能去極目
西南天哀鳴亂幽緒

春日雜言

長空多浮雲微雨霑四郊美人隔蘭渚雜佩不可要去
年梁間燕今歲將尋巢時物各芬芳吾興亦飄颻珠箔
障東風星月耿深宵欲理陽春詞朱絃為君調

二十五日有作

悴葉看復脫，遠聽無回音。
美環墮石砌，破碎安可任。
平生氣頗逸，不受萬事侵。
幾因兒女曹，折盡壯士心。
南舟駕言邁，先壟行復尋。
感此事悽惻，何用榮朝簪。
林頭富緇帙，囊中有素琴。
恨來煮白鶴，放歌青松林。

漢宮詞

漢宮有明月，秋風悴碧枝。
紫苔繡壁帶，積翠隱羅衣。
夜久星河變，人來鸚鵡知。
舊恩隨露瀉，餘歡與日移。
尚憶

朝辭輦深承夜誦詩陽阿新得幸谷永况多辭指斥椒
房寵吹求飾室疵榮枯付階草物化效冰漸無言掩明
鏡千古妬蛾眉

遠別離

秦雲隴樹高復低君去輪臺西更西亦知此別經歲月
臨歧素手牽衣啼山長水深覓無處妾心如荼苦復苦
玉顏顛頰金縷裂猶憶徘徊出門語春冰易消雲易斷
妾意如何不零亂人生難得駐朱顏空惟夜長淚潛潛

擬古傷歌行

葉落花殘君不見春來秋去如飛電富貴千年劫火灰
丘陵幾度桑田變五侯高樓臨大道寶釵金鈿埋秋草
張況寧知金穴平楊家一旦冰山倒君看荒塚饒荆棘
當年俱有回天力歡君對酒且高歌莫負庭前芳草色

烏夜啼

庭前古槐猶未花寶釵晨入兒夫家兒夫重俠輕離別
空庭夜半啼烏鴉誰將鴛鴦枕千行淚却寄龍城萬里沙

有所思

雙星熒熒隔秋水，秋入城頭漏聲裏。
窻間梧桐風瑟瑟，青鳥南飛月華白。
朱絃一撥意已傳，夢繞博山雙紫烟。
藕絲易脫雲易散，十二碧峰秋雨前。

上殿熊

熊上殿昭儀趨，誰其當者馮婕妤。
玉顏豈能編虎鬚，不難一死遮乘輿。
孟陽登林信誑楚，亦有華泉逢丑父。
分明造次效忠貞，豈意嬋媛成錯迂。
傅姬手持黃紙來，昔

何勇銳今何衰兩朝淚濕黃金階
宮中妬色亦妬才

有所思

東風二月揚新沙
憶醉燕南豪士家
狂歌劇舞共春色
正值東隣桃始華
情闌每厭箏笛聒
意放不遣山林遮
船頭詩篇船尾酒
解纜直下清溪涯
太原喬生興踔絕
偏愛漁簑冒風雪
杯空正自吸流泉
月出先判宿巖穴
封龍山人意原苦
坐覺悲風起尊俎
鬢星豈乏長安塵
衣斑尚帶西湖雨
百年離合江上雲
萬事紛紜江水紋

千里夕陽春草綠
停雲空憶鮑參軍

暮夜金

暮夜金光陸離故人心
君不知金經百鍊不爽毫與釐
故入之心良似之
還君金君往矣但願君為清白吏絕
勝千金報知己

首陽薇

朝采薇露未晞夕采薇風淒淒
岐山東來墨為線大白
小白懸兩旗食周之粟不如蕨與薇
蕨薇雖不飽應是

商山草

契苾兒曲周垂拱間民歌契苾兒詞曲多媒豔
亦樂之妖也契苾兒張易之小字

君歌契苾兒妾按龜茲舞酒盡燈欲滅堂前鸚鵡語光
順門宣供奉郎蓮塘水煖雙鴛鴦象牀犀簟伏熊枕春
風夜簸花枝狂誰家少年眼如虎犁斷并州杏花雨

迎冬詞

畫簷小鐵嘶北風疎櫳日影搖輕紅疊綺重茵夜雲煖

博山紫氣飛遙空霜淒落葉護寒井素綆縈紆指尖冷
翠并東面繡新苔幻出瀟湘美人影日高寶瑟拂蛛絲
魚上深潭鵲遠枝十二闌干烟細細伊州一曲譜相思

邯鄲行

邯鄲女兒未二十堂下理箏堂上食梅魂清澈藕絲柔
舞罷花枝困無力羅幃繡幕春復春可憐白壁滯風塵
陌上幾逢朱履客花前誰是錦袍人百年命分多不偶
不獨西池蒲與柳李廣不侯馮衍貧文姬流落明妃朽

傷心萬事難具論積恨烟絲春草痕

大陸行

大陸澤水秋泠泠葦花初白荷蓋青紅裊蕩粲綠波靚
八月江寒猶采菱菱角槎牙芡實滿明珠紫貝多零散
白日清歌應石淙黃昏鳴佩隨歸伴西風作惡凋葶衣
穠華回首葉飛飛塞鴻嘹唳江南歸陽和漸減霜生威
百年富貴轉眼非昔人遊處尚依稀水頭屏營見漁火
深夜洞房清淚微

陌上花歎

陌上花何離離秋風吹汝汝不知汝有丹葩及紫萼恨
汝不植瓊瑤池朝朝行人暮遊子泣露酣霞何日止花
枝漸減秋月寒獨抱餘芳道傍死不如三月楊柳綿猶
自飄颻帝城裏

擬古苔榮曲

苔之榮美如沐春風揚素蕤幽姿媚空谷銀罌酒滿瑤
瑟哀孟姚夜入黃金闈宮中椎鼓進胡樂司過不稱秦

與齊愛償意授政機弛子章蒼黃子何喜狐疑竟蹈兩
端留雀鷲寧知三月死美如沐苔之榮莫保枝榦安保
名先王冠服尚可改家國大防毋自壞

朱仙豪客歌

北風吹塵江水竭萬里行人雁書絕龍亡虎逝山河裂
英雄掩面空啼血城門土赤暗霧腥塞草今非一塚青
頗聞淵聖髮已白日夕但望南來兵吁嗟將軍勿南行
千載一朝勢已成烏珠夜遯中原平誰持金字符駱驛

趨公營吾將磔汝萬段投饑鷹將軍得制閫外事姦臣
誤國安可憑吁嗟將軍勿南行

登臨篇

登高丘臨清流驚濤拍岸風蕭颯東奔到海何日休浮
生聚散類萍梗滿地花草凝閒愁士雅空盟大江楫仲
宣復上荆南樓日落蒼梧思帝子風生蘆葉按伊州富
貴豪華成莽蒼斜月窺林影千丈誰家金塢草猶黃舊
日歌臺一竟往舊人已往新復來仍張寶瑟勸金杯流

魚偶與水相得長嘯不知山欲摧鬢毛未白心成灰城
南啼鳥聲絕哀長空蘸酒波瀕洞峻阪墮足愁崔嵬仰
天憤頓一起舞蹋碎石濠千古苔

巫山高

巫山高十二重攢峰繡出青芙蓉朝雲不返暮雨歇金
輿冷落雙盤龍秋橫素山澹相續萬壑鳴泉響寒玉風
流宋玉况多情揮絃更奏相思曲曲聲嘹亮繞天愁雨
態雲情凝不流寒烟裙紫草鈿碧楚王猶在離宮泣

秋蓮曲

西塘菡萏初破紅小舟蕩漾東南風羅裳曳水蘸輕碧
驚起沙頭雙落鴻昨日采蓮蓮尚好今朝采蓮蓮已老
綠房結子空垂垂翠黛朱顏可長保江頭日暮生嫩寒
鴛鴦雙飛不過灘回頭女伴各無語淚灑銅仙承露盤

妾薄命

女家趙下襄陽往來大河蕩輕槳嬌紅膩白照清波一
曲高歌衆惆悵去年花枝今又紅白日西沒月生東顏

色空隨落花陣，恩情旋逐東南風。當時容顏不自保，而今零落如秋草。夜夜傷心淚暗垂，出門萬里長安道。

雨雁詞

猛雨斷哀雁，離離不成行。寒雲蔽關塞，落月暗瀟湘。樓中鼓角飛秋霜，仰看孤影空彷徨。拈鍼繡作孤鴛鴦，為寄遠遊都下郎。燈寒指冷夜寂寂，獨抱瑤琴為君泣。

西湖

城中稀暇日，取適過林泉。古寺排金榜，離宮枕玉泉。折

花聊映醉藉草亦成眠不學王孫嘔平心過百年

從軍行

邊書昨日至雜虜寇涼州劔拔明霜夜弓開滿月秋黃
金裝戰甲健羽插兜鍪跨馬鳴鞭去心輕定遠侯

寄北覺隆上人

水北多僧寺生公院最幽地高平受月林密靜宜秋梵
語中天應鐘聲下界浮文園多病客回首欲淹留

雙雁傷翮育于庭中有感

自是排雲侶秋深被網羅
耦行猶作字長恨不成歌
北望燕山月南思楚水波
忽驚樓外影愁絕定如何

遊北寺亭上人後園

偶為尋詩出穠華觸眼新
鳥歌行酒地花覆倚闌人
風簾渾無譜蟲書太逼真
絕勝絃管夜紅袖舞香塵

過丘頭寺故韓師院

古寺高僧去荒林但鳥歸
鐘浮石潭月苔滿畫廊衣
世事驚春夢西風冷宦機
坐看秋葉下惆悵昔人非

西港

高城舒一望，明月下銀沙。
草閣平臨野，溪流半遶槎。
樹巖秋尚茂，蘭靜晚宜花。
不為尋真隱，誰能卧紫霞。

早起

八月行復盡，寒空雁未疎。
壯懷頻倚劔，短髮不勝梳。
早菊披金縷，晴雲斂翠裾。
西南有佳氣，邊捷定何如。

風中花

春花有殊色，何事逐風流。
欲墮還依水，頻飛不過樓。
託

枝憐命薄傾國使人愁願落簾櫳裏遺香尚及秋

園中

思君不可見三月正花飛楊柳垂金縷新苔勝舞衣鳥
來枝上語人自水邊歸盡日西南望空山但落暉

宿性公院

清齋夜無寐星月耿前除野客尋詩罷高僧入定初欲
來還去夢纔讀又忘書豈為悲華髮聰明漸不如

晚望次韻二首

西望多錦樹亭亭出古松
清心休住寺遠聽却宜鐘
漸老詩還拙空酣草未勻
不知仙掌露何以療疎慵

白髮不忍摘朝來添數莖
青銅豈有意紅葉漸無聲
草木留心在山河對目明
先人有遺劍曾為說西征

東昌答鄭侍御

勞君相問訊別意正茫茫
魯國風何古吳山路更長
水平舟去穩春暖雁飛忙
安得乘驄使追隨達建康

同陳宗之諸同年飲雞鳴山憑虛閣時羅太常

景鳴作倡

細雨緣山到清風待客來
閣凌霄漢起門傍斗牛開
雲樹千家錦豪華六代才
遺蹤不可問今古一銜杯

得白宗伯先生書

北雁正南翔書來自帝鄉
人同秋色老情比道塗長
禮樂歸宗伯文章憶大方
江湖無限意延佇幾斜陽

月

為月一登樓長風更試秋水
搖城闕迥河帶斗星流古

木蕭蕭下閒雲淡淡浮祇應今夜景能破杜陵愁

燈花

誰道春光薄寒燈亦放花粟金裝寶樹文火伏丹砂千
里長為客三年不見家明朝有鄉信遙寄自天涯

晚望

西郊日日望偏愛夕陽峰野水多宜鷺疎林不礙鐘烟
中古廟出山口斷雲封惆悵東飛鳥翩翩為客慵

過李徵伯墓

西崖閣
老子

烟霧棲古道蓬藿掩荒丘壁有題詩處雲橫作記樓多才悲命薄浮世幾名留惆悵香山社交知半白頭

早春

春色來何處蓬窓試一開積寒猶困柳晴雪漸舒苔未舉書雲筆新停送臘杯江山多舊約斜日重徘徊

易州道中

西風羸馬經行地易水長城是舊都壯士入秦名尚在客卿歸趙勢全孤高臺歲久黃金盡古塞秋深白雁徂

聞道關門猶鎖鑰
太平天子慎邊隅

天壽山

銀峰翠壁峙諸孫
嶽勢雄開祖宅尊
關塞正當山右臂
風雷近接海西門
龍過古澗多成雨
虎撼長松半出根
隱隱五陵佳氣在
欲攀弓劍泣深恩

送胡長史從益府之建昌

親隨帝子出龍墀
曳紫橫金見陛辭
羽附雄風千里外
心懸北斗十年時
周人壤地新開國
漢代賢良舊下帷

歌頌不妨長紀事君王方采列侯詩

栢井別兄作

門對青山閣俯流弦歌聲裏却生愁最難為別緣同氣
忽漫相看是異州春草不違池上夢布帆先問水邊舟
金陵迢遞勞頻憶夜夜聞鴻定倚樓

秋興

長洲沃野抱城斜未為深秋減物華樓近紫清聞朔雁
水通銀漢識仙槎承平江海多漁牧落日邊關半鼓笳

為問開元橋上客
月中丹桂幾生花

古意

志士多悲心
如何值秋夜
仰見星月光
歎息茅簷下

酌泉

往往城中水
不如城外甘
如何市上客
不肯住城南

擬古

桃花隨意紅
柳枝向人綠
山人夜歸來
獨上蘭皋宿

砧聲

伴月擣玄霜隨風送征雁行人歸未歸聲停意方亂

古意

秋水凝細縠秋月鳴雙杵江南雁欲歸來向簾前語

唐宮詞

四月笙歌拂苑池瑞蓮花對海棠絲昭容尚記開元日
正是宮中蠶老時

中平宮詞

宮市新開御水邊繡襦爭立市門前酒姬未放驢車過

自問劉郎索酒錢

貞元宮詞

君王不愛長門賦才士空吟散雪詞
獨閉深宮轉蕭索
露花垂老合歡枝

金陵

織錦坊前春日明
賣魚橋上晚波生
城中盡日無絃管
時有漁歌三兩聲

題李後主畫鵝鶉

翠袖成圍紫殿深
曾看一勝抵千金
如何解甲臨城日
不及山禽有鬪心

石倉歷代詩選卷四百十

欽定四庫全書

石倉歷代詩選卷四百十一

明 曹學佺 編

明詩次集四十五

陳崇德

別張朝昇太學

朝發金陵道暮泛龍江潮馳心在桑梓寧辭歸路遙送
客星初散離人酒半消秋風起天末秋月明通宵俯仰

吟懷壯逸興何飄飄念子青雲器高談見風標况歷賢
關久薰陶非一朝茲行趨覲省拜慶樂陶陶明當奮鵬
翼九萬看扶搖

題山水圖

山外山水外水微茫夕照中黯淡白雲裏幽花野草山
中春葛巾野服山中人彷彿桃源武夷境筆端造化妙
奪神羨君自是隱逸者門外不聞喧車馬心目長存山
水間無聲之詩有聲畫

又

雲渺渺水溟溟高樹低樹連陰密遠山近山無數青中
有高人抱幽獨坐卧煙霞隔塵俗瑤琴一曲來宮商俯
仰乾坤心自足嗟余遊宦住江東此身未脫樊籠中披
圖薦爾懷鄉國家在雲山第幾重

咏菊

商飈淨羣芳秋光滿徑黃清香留晚節佳色壯重陽葉
外稀蟬語籬邊謝蝶忙陶公雖任懶三徑未曾荒

春園曉起

春光無限意，曉日壓欄紅。
詩興隨吟筆，幽懷入釣筒。
人遊交翠裏，鳥語密陰中。
金谷真堪賞，朝朝與客同。

同沈憲長飲觀音閣

坐客總非凡，狂吟醉石巖。
諸峰連座榻，極浦送歸帆。
地迥凌高閣，春寒透舊衫。
僕夫催上馬，鐘響隔林杉。

同靜夫遊石磬岫

同遊看策杖，雲淨露山腰。
綠樹分陰入，幽禽向晚招。
菊

斟陶令酒風漸許由瓢非是爛柯者行行聽採樵

題黎雲軒

不隨桃李結芳隣院落梨花伴此身帶雨飄零千片雪
堆雲暗護一枝春夢回窗外紅塵遠忘却人間白髮新
幾度黃昏禪定後相看清况更宜人

題春山卷

高人僻愛春山好一段幽懷盡向開清氣都收詩卷裏
風光總付酒杯來繁花亂吐紅交白啼鳥驚飛去復回

却笑紛紛名利客白頭猶自走塵埃

九日遊桂山

上盡層波山上山興來氣力健無慳
衣冠艷拂黃花畔僕御聲傳碧嶂間
不學孟嘉當日醉却懷陶令此身閒
何時辦了公家事隨處青山策杖攀

湘南別意送詹廷信入賀

花滿江亭酒滿觴十分春色送行裝
看山馬首吟行壯別路天涯客思長
萬國衣冠同際會三相文物仰輝光

祝呼聖壽瑤觴後更取邊情入奏章

寓陽朔

四野山多少有墟山形露骨洞巖虛眼前瘡疾誰能療
紙上文移我厭書功利乘時矣可久治安長策竟何如
列城願得朝歌長盤錯何愁不盡除

寓灌陽

六年踪跡未曾停冒走風塵每見星按節敢辭灘路惡
看山直入灌陽青竹籬茅舍千門月石徑溪橋幾處亭

但得客身長是健瘴鄉雖久不妨經

贈陳秉衡憲副歸田

金印何如二頃田秋風萬里一歸船
休將前路征夫問笑拂青松野鶴翩
玩水觀山真有味吟風弄月欲忘眠
功名到底成何用樂得閒身未老年

夏日登賓州南樓

煙樹蒼茫眼界賒樓頭踏徧日西斜
雲開遠景看林木風帶微香度野花
山不斷青連碧漢水微拖綠護田家

近來喜得邊塵淨
仰仗兵威鎮泰華

遊靈峰寺

滿眼峰巒總是詩
揮毫難盡箇中奇
鳴琴聲徹歸雲洞
曲水流同品字池
啼鳥忽聞無覓處
好山貪看立多時
興遊忘却歸途晚
望海亭前月上遲

歸休次靜夫韻

飄然逸興浩無涯
乞得閒身莫浪誇
堪笑老來偏愛酒
每占春到着飛葭
青山識面常當戶
明月知心自到家

靜裏東風看若許每逢花落惜年華

菊花十月始開

今歲黃花開較遲入冬纔見綻東籬一秋空負有佳色
九月無由望白衣橘綠橙黃添好景桃嬌柳媚任先時
須知晚節堅如許似接寒梅雪裏姿

有感

人生不定似飄蓬老至安能少壯同短髮更無千日黑
醜顏剛借一時紅添年換歲聊為樂糲食粗衣未底窮

敢告東隣與西舍將余錯認舊乘驄

朗司務上京過別餞於風山洞

偶得公餘半日間追尋佳境志躋攀行聽好鳥出孤嶂
看盡閒雲到遠山翠色巖邊千樹合夕陽林下一僧還
樽前喜有能吟客管領風光共笑顏

來青亭閒咏

君恩曾未報涓埃便學淵明歸去來儘日從容無一事
好花猶自倩人栽

江田陳氏家傳云公諱崇德字季廣成化辛丑進士
為監察御史同官楊茂元以直諫觸茂陵怒禍幾不
測衆皆縮舌公獨抗疏救之上意始解尋陞廣西兵
備副使會柳慶獯寇作亂公設方略殲其渠魁踰月
而平兩臺上功遂擢本省叅政浙江右布政使時逆
瑾弄權賄賂旁午公不入其門因致政歸

附陳良貴

字文介有
南坡集

春日書懷

一自春回睡覺甜起來無語獨掀髯園林觸目深紅間
池館驚心嫩綠兼裊裊柳枝低舞袖霏霏杏葉襯粧奩
別離到處王孫草搖曳東郊酒客帘邠老病因沉醉宿
少陵狂為惱花添尋芳翠映金鈿濕鬪草香憐玉指尖
沂水已看波映岼謝池誰賦雪為鹽弄簧愁極鶯啼樹
顧壘情多燕入簾薄暖幾回生短褐輕寒猶自戀重幃
鶯啼似怨春將暮燕語因知夏聿漸祇恐東皇歸去急
惜花詩句短長占

夏日即事

青檀坐對此虛堂惟有荷風過短牆早起却憐春已去
閒來自覺日偏長綠迷隋苑顰楊柳紅褪唐宮怨海棠
光景如流寒又燠天時未定雨違暘梅梢細聽瀟瀟雨
草色行吟淺淺塘儘有蓬門堪問字更無勝地可尋芳
詩從得句吟偏苦鬢到中年覺漸蒼贏得芸編頻課子
官貧方免此身忙

題彭工部山水

江風夜散溪頭雨，楓葉蕭蕭滿沙渚。沙邊野客送輕舟，
舟上離人若相語。風多語急了，不聞櫓聲伊軋誰能分。
迴波極浦無尋處，只隔中流一片雲。君住江南我江北，
長記相逢未相識。忽將歸興逐飛鴻，舉袂欲招招不得。
揮毫作畫者何人，畫中之意頗亦真。向來人事幾遷易，
碧水青山秋復春。

關山月

關山月別來二十四，圓缺孤舟露下濕。那箇對此清光

愁斷絕故園兩度開黃花
鳩婦看花雙黛蹙
人生那得長相隨
倏忽天南又天北
推蓬撫景謾咨嗟
願風吹作碧雲遮
幽閨免此共相憶
腸斷月高還自斜
關山月底事經年
照離別君不見
三關烽火羽書馳
壯士衝寒淚流血

再題彭工部山水

竹屋斜連江上臺
沿波芳草青如苔
沙頭雨急春水長
雲飛極浦輕舟開
百年浮世誰非客
却怪今朝有離別

萬山千山不盡思
相思夜夜同明月
無情歲序如水流
初春一別又深秋
夢中猶記別時語
只在門前雙樹頭
因嗟王粲滯歸去
思鄉空有登樓句
披圖如得到江南
歷歷當年舊遊處

大安驛

逢人音語異
作客歎殊方
北去連孤嶂
西飛又夕陽
雪霜侵被冷
風雨入更長
獨擁皇華卧
孤燈繞夢涼

秋夕無寐

金史卷一百一十一
卷四百十一
一番風雨過庭院覺新涼老至夜無寐秋來更轉長螢
光斜入戶蟾影漏侵牀撫枕無言處流年兩鬢霜

乙酉陽朔除夕

每食歎無餘官貧歲又除家山頻入夢京國久稽書樞
上空羸馬池邊欲涸魚歸心閩海嶠課子帶經鋤

覺衰

老來筋力倦拜起異尋常把酒惜餘景對花愁斷腸數
莖空白髮一飯足黃粱俯仰能無愧浮生付彼蒼

寓蘭溪

旅食慚萍梗孤舟坐黯然酒思陶令日詩負菊花前薄
柳蟬聲急平坡雁陣偏一年光景去聊紀此秋篇

蘇堤

晚風吹柳拂堤勻人去堤空草自春潭月尚留方外趣
湘裊誰詠景中人茅椒山擁青螺髻窈窕煙迷淥水濱
却笑樊籠雙短鬢幾能來此濯氛塵

過釣臺

萬古清風繫此山，釣臺高瞰碧波灣。
落花無數曉風急，啼鳥幾聲春夢閒。
半夜空占星斗渚，一竿先破利名關。
自慚薄宦猶羈旅，舟過黃昏也赧顏。

遊萬松山寺

墨水東馳一鑑懸，隔江幽趣浩無邊。
閒憑古剎峰千點，遠望春波水滿田。
野客到時鷗自狎，禪僧定後鶴初旋。
重尋未有三生約，一笑歸來月滿川。

送春書懷

鎮日書堂靜掩扉，亂紅飄盡覺春歸。
好花似共流光老，衰柳應同故舊稀。
斑管不教題五鳳，錦文誰復理殘機。
療貧雖得毛生檄，欲奉雙親願已違。

陪李太守俞別駕遊玲瓏巖

層層鳥道亂雲通，巖際靈泉漱石宮。
穿塢柳風吹鬢綠，傍巖花影落杯紅。
仇池往事真成幻，勾漏丹成已馭風。
留此好山供勝賞，不辭歸路夕陽中。

秋夜吟

銀牀一葉敗梧飄旋覺天潢斗轉杓風竹有聲如玉珮
月華多影類冰綃幽蟲砌下雙催織隣女風前自弄簫
秋景滿懷剛不寐那應楚客獨無聊

春日遊凌江

倚棹漁郎短笛風凌江疑在畫圖中一篷春思蘼蕪綠
十里煙光躑躅紅望遠共憐山色異尋真直溯水源窮
笙簫莫遣韶華邁一片花飛西復東

古塔

岡勢盤盤聳碧空何年古塔定方中
銀河色映三山月
鐵馬聲隨五夜風
七級開花懸漢表
千尋倒影掛樓東
未論佛語諸天近
且壯臨淮巨鎮雄

七夕

銀河雖廣鵲橋通
牛女佳期此夕中
九曲迴腸終歲結
雙星顧影暫時同
瑤情月下和絲亂
血淚人間作雨紅
莫道別多相會少
絕勝仙子廣寒宮

遊西湖

湧金門外水如天湖上風光倍爽然楊柳有情憐野客
梅花無主夢詩仙搖搖帘影迎春旭隱隱鐘聲起暮煙
莫羨蘭亭脩禊事風流堪比永和年

秋夜月

冰輪光映桂花天風露娟娟夜未眠老景逢秋多少思
良宵見月幾回圓浮雲滅沒銀河淨靈籟淒涼北斗懸
踏徧瓊瑤花影碎數聲鴻雁落雲邊

野望

花光濃艷鳥聲嬌野水平田透小橋雲散天邊千丈碧
雨晴江上數峰遙閒從門徑多栽柳靜向山林學棄瓢
節序催人春又去綠添芳草轉無聊

秋夜

一夜涼飈透葛裳滿庭詩景剩淒涼蟲聲雨後鳴荒砌
螢火風前度短牆竹簟冷涵流水氣藤樽清惹敗荷香
人生感慨無今古不特悲秋是宋郎

題英石

聞說元章拜石翁
頓令今古想高風
鮫人斫碎雲根處
水母擎來石案中
斑駁有情春雨濕
玲瓏無語夜堂空
何須更躡東山屐
鎮日儀刑岳丈同

雨中

江雲堆墨暗春城
十日都無一日晴
楊柳陌頭窺冷眼
桃花枝上落紅英
鶯當苦雨啼應澀
燕為留人語有情
明發別君江上路
王孫芳草恨牽縈

立春

獨擁青氈隨分安夢醒長是日三竿慚無補報酬明主
敢以清貧歎冷官客裏每憐新歲至閒來猶把舊書看
春風駘蕩千門裏虛度年光強自歡

漁浦

漁浦東頭幾問津風波仍舊客懷新雲山千里勞鄉夢
萍水經年少故人楚客候潮舟似蟻吳兒歌調月如銀
推蓬無那霜華重多少寒威怯早春

車盤次許都諫韻

狂風疎雨暗消魂，車馬紛闐客路喧。
流水亭臺環翠竹，出林雞犬間孤村。
旅懷對此偏增感，鄉信憑誰可寄言。
注目長安遙萬里，一鞭行色又黃昏。

客中示兒

悵望閩關萬里遊，迢迢親舍隔滄洲。
還家有夢三更月，閱世無能四十秋。
黃卷功勤頻致望，青檀官冷復何求。
乘時好賴賢孫子，莫待區區半白頭。

玲瓏仙室

杖藜穿透碧玲瓏
九折虛巖有路通
一自神仙歸去後
桃花開徧幾春風

躍溪春漲

神龍早已躍滄溟
勝跡于今水尚腥
昨夜桃花春雨泛
溪流沉璧浸沙汀

石倉歷代詩選卷四百十一

欽定四庫全書

石倉歷代詩選卷四百十二

明 曹學佺 編

明詩次集四十六

黃仲昭

琴書真趣為三山王用忠賦

伊人愛文雅夙志不外慕琴書日自娛蕭散澄神慮寶
鳴風微薰藜燈雨初度膝上罷絲桐牀頭披竹素煩襟

日以清至理日以悟俯仰天地間悠然有真趣予亦契
茲懷苦被微名誤勞勞西復東流俗共馳騫有琴度高
閣有書閉深戶紅塵汨天真欲避不能去安得謝浮榮
相從竟朝暮

效古

握手與君別萬里從此辭悠悠道路長惻惻中心悲白
日西山沒流水東海馳東西各異勢會合良難期明月
有時缺思君長不絕茫茫春雪深道路沒歸轍驅馳力

已疲憔悴髮已白君心但自保豈敢輕離別

其二

浮萍逐水流落絮隨風起青樓有佳人自矜容色美瑤
箏弄玉織清歌呈皓齒堅貞不自持托身游俠子一朝
遭棄捐飄飄無定止

其三

中城有危樓萬象勢盡低飛簷煥華采傑棟凌雲霓樓
中有少婦良人久乖睽有時歌聲起秋風共淒淒秦箏

清且哀調與歌聲齊宛轉不能已青天紅日西眼前孰
知音絃歌徒悲悽却羨比翼鳥一雙長並棲

其四

皎皎織女星獨處河之澳頻年織雲錦燦爛盈杼袖剪
裁勞玉纖將與牽牛服欲度河無梁耿耿亂心曲馳情
獨悵望但見河水綠

其五

死者不可作生者尚未衰生時不共樂死去復難追瞻

彼南山麓丘塚何纍纍感之思故國旋歸苦無期登高
獨徘徊耿耿徒傷悲

其六

西風起林木物候何淒涼芙蓉銷華澤蘋蓼揚輝光良
人久離別關山阻且長新愛有佳人舊歡從此忘賤妾
若葵花良人若太陽太陽雖轉移葵花長仰望昨宵魂
夢裏忽到良人傍携手共言笑歡樂猶未央須臾復不
見拊心重徬徨本期鴛與鴛一雙長翱翔棄捐今若此

有淚空沾裳

其七

東風入庭樹，忽動閨中思。
春去今復歸，遊子獨何之。
瞻彼天壤間，萬物咸熙熙。
孤妾獨徘徊，悠悠雙淚垂。
風霜但自保，會面良有期。

擬古

故人千里別，遺我雙干將。
其鞘飾鞞琫，其刃生寒銑。
鞘以示韜晦，刃以明堅剛。
時行即徇義，時止當深藏。
雌雄

喻同心以最長不忘

風梅

南枝春意深繁葩吐奇馥東風一夜來吹落滿庭玉樹
底莓苔紋漸失舊時綠騷客曉開門忽訝韶華速

煙梅

天然玉雪姿托根依絕巘縹緲隔寒煙不辨春深淺世
人愛桃李清標識應鮮天公似有意欲遮塵俗眼

雪梅

玄雲晝冥冥雪滿空山裏百卉淒以腓無復舊紅紫獨
有山中梅凌寒花鞞鞞分明烈士心不隨頽俗靡

題山水圖為仙溪林廷寬賦春景

積雨曉初晴林巒翠如沐鵲鷦知陽春桑巔催布穀騎
驢者誰子尋芳縱吟目何日脫名韉青山並幽躅

秋景

幽人隱者流脩然不外慕空山罷釣歸寂莫秋山暮開
樽風滿樓吟詩月當戶回首聲利場勞勞正行路

題鸚鵡

幽禽何處來飛向琅玕樹金眸爍晴曦鮮羽濯朝露春
風紫禁中竒音數聲度鸚鵡喙無言花間屢驚顧

題四景山水圖為李生時爵賦

春意入遙山漸覺燒痕綠驅犢向東臯一犁雨初足田
園樂事多吾將返吾轂

夜來積雪深曉覺寒威逼呼童棹扁舟蕩漾安所適隔
溪有寒梅欲訪春消息

送僧石菴歸饒州

上人自是雲水蹤一瓶一錫西復東
參禪遊徧京華寺忽憶故鄉天外峰
滿空涼露洗殘暑木杯曉發長河渚
吹醒禪心蘋蓼風驚殘詩夢梧桐雨
一夜蒼松偃故山叢林法雨應知還
遙想山中舊猿鶴相迎已出蒼松關

止賜酒

聖皇體天敷庶政飲酒常欲順時令
詞林氣候衆冽時黃封日賜驅寒威
盛夏驕陽正炎赫斯時飲酒當知節

以茲特詔光祿官天厨芳醕暫停頒非若楚王慢賢哲
醴酒不為穆生設

觀鬪雀

玉署沉沉春晝靜嘉木滿庭煙翠暝黃雀應知地勢幽
呼朋引類紛成陣萬物雖云各有營爾形至眇良易盈
何有心中不平事昂頭鼓翅忿且爭兩雄相持不相讓
失勢俱落空庭上戰聲葉底亂啾啾落羽風前飄蕩颺
須臾驚散各西東怒氣更似橫胸中嗟爾由來氣類合

胡為轉眼難相容嗚呼世人競利亦如此何必臨風深
歎爾

石室薰風

赤日燒空方六月石室招提最清絕薰風習習起巖阿
爽氣蕭蕭滿林樾林君自是人中仙尋幽慣醉薰風前
半幅生綃寫幽致吟邊差覺生意全

半松為莆郡司訓松江宋黻賦

蒼松如龍出幽谷未露全身露頭角天生大材不大用

半在雲霄半林壑，浮世難逢匠石過。空餘滿地清陰多，
明堂不作歲云暮。松兮松兮柰爾何。

送庶吉士鍾美宣乃叔還番禺

遠謁鑿坡署，殷勤訪阿咸。羊城勞客夢，潞水問歸帆。荔
子紅垂屋，榕陰翠遶巖。品題應有句，珍重示來緘。

送楊汝介奉其父考功公之命歸省祖母

遠奉嚴君命，重闈問起居。異鄉頻有夢，故國久無書。潞
渚冰消後，都門酒盡初。愁心關去住，臨別重躊躇。

圃東新井

玉署井初成寒泉一鏡平潤滋蒼蘚茁色映翠梧清澄
碧涵天影虛圓浸月明何當分涸轍枯鮒總回生

和駱順菴邑博雨中見懷韻

良晤連朝阻憑高望泮宮煙雲迷旦暮樓閣隱青紅溪
漲千峰雨蟬鳴一葉風知君能念我兩地思應同

遊昭武西塔寺和劉太守仁甫韻

偶同登古寺樓閣夕陽邊列雉低連樹遙山翠倚天勞

生成底事客路又經年只合還山去塵纓濯澗泉

拙戒吳方伯亭成翠渠有詩寄題次韻

聞說吳方伯幽亭構已成四簷深樹暝一雨小池平
鷺依人宿蓴鱸餉客烹良遊嗟未遂幾度夢中行

遊囊山寺追和柯竹巖先生

一徑斜通寺蒼松帶碧溪樓臺晴日麗雲海暮山低
亭擁蒼霞暝窗橫翠靄迷老僧誰得似長伴白雲棲

又

寺遠人稀到岩扉盡日扃烏窺山殿供風亂石牀經巢
鶴松枝老潛虬澗水腥同遊總知己相對眼俱青

登辟支巖追次柯竹巖先生韻

層巖窮勝覽舉首近晴空城郭斜陽外村墟斷靄中野
水連雲白殘霞映樹紅東南天更遠極目望冥鴻

登九仙觀舒嘯臺

榛莽新芟闢天然數仞臺煙雲連睥睨殿閣俯崔嵬遠
岫橫江斷寒潮到郭回登臨一舒嘯天地旅懷開

經廬山東林寺又用始祖御史公韻

徙倚看竒勝乾坤雨霽時林巒含喜色花鳥似前期晴
竹黃金影新梧碧玉枝幽亭事事好不獨瞰清池

送李君唐英赴春官

感別情偏切離筵酒易酣孤舟搖霽月一騎入晴嵐戀
闕心懸北思親夢繞南明朝倚樓處雲樹渺難堪

楓嶺

楓嶺度征軒臨風思惘然蒼松悲唳鶴深谷慘啼鶻泉

雜山頭雨人穿樹杪煙庭闌何處是長望白雲邊

秋鴻

萬里無矰繳江湖得自由遠依南地暖因覺北天秋疎
雨投荒圃殘陽度遠洲叫霜催落葉送冷入征裘影亂
風橫塞聲寒月滿樓蘆深依晚渚稻熟下平疇孤館初
驚夢新霜欲上頭帛書無復繫中外戴宸旒

賦得洪都艤棹送同年張叔亨使東廣

手捧綸音出帝州豫章城外暫維舟文星高映青山郭

使節光臨綠水洲
徐孺宅前吟弔古
滕王閣上醉尋幽
計程漸近東甌路
此去分明是畫遊

送太學生周環依親還吉水得金字

十年芹泮擁青襟
壁水新沾雨露深
明月暫同官舍酒
白雲終動故園心
帆開潞渚潮平岼
路入廬山雪滿林
天上還期繩祖武
勲名奕葉重南金

送同年俞舜卿任南京刑科給事中

曉辭龍袞向南畿
帶得天恩入瑣闈
戀闕應勞清夢到

匡時莫遣諫書稀
雲邊山色青迎騎
雨後花香暖撲衣
便道懸知歸故里
松楸桑梓盡光輝

謁文丞相祠

故宮芳草泣銅人
滄海樓船是紫宸
赤手欲擎西墜日
丹心誓掃北來塵
山河萬里雙垂淚
廟宇千年獨降神
翹首燕山知幾仞
至今高節共嶙峋

送撫寧侯朱永征北虜

將軍拜命向邊城
誓斬天驕翼
太平風起柳營朝
草檄

月明花帳夜談兵
貔貅宣力皇威振
狐兔潛蹤塞漠清
勲業行看光汗簡
爭教衛霍獨馳名

遺懷

誰點霜華入鬢斑
雨聲連夜苦潺潺
逢迎無術貧誰咎
婚嫁催人老未閒
仗節伏波遭死謗
見幾疏傳却生還
聖恩儻賜餘生骨
便買邱園入故山

送林尚和還莆

客窗燈火久談經
幾度階前見落萸
夢裏老親雙鬢白

望中鄉國亂山青一樽菊醕芙蓉岼數幅蒲帆杜若汀
大阮青霄應惜別龍門竚待駕風霆

謫官之湘潭夜泊蕭家林和莊孔暘韻

鴉背殘陽度遠洲遠村籬落暮煙稠浮生飄忽多行路
此地經過幾繫舟戀闕心隨雲北去思親夢逐水東流
臨風却羨沙頭鷺欲結新盟謝遠遊

送辦事官吳藻省親歸莆

書劔三年客帝畿承恩今喜謁庭闈不須重製斑斕服

自有新裁錦繡衣一棹纔乘潮水去寸心先逐海雲飛
難兄林下幽棲穩應笑紅塵客未歸

送顧安道御史僉憲河南

新雁催寒柳葉稀多君匹馬出南畿已遷泉府新官秩
仍着烏臺舊繡衣崕谷有天回淑氣豺狼無地避霜威
法星暫照中州去終化台星入紫微

秋日寫懷

一官南北總窮途浮世逢人笑腐儒囊裏無錢還藥債

門前有客索詩通滿天風露鳴蟬亂萬里煙雲旅雁孤
一片歸心留不住非因故國有尊鱸

賀太常少卿夏公陞大理卿代孫寺丞賦

久向雲霄仰盛名同官今喜挹餘馨伯夷暫典虞廷禮
定國還詳漢室刑門絕苞苴草綠獄求欽恤夜燈青
似聞太史占元象執法星高入紫冥

題卓季新龍山別業卷

龍山風景足徜徉况是林巒接故鄉萬頃松雲當戶暝

一天花雨入簾香
荷鋤煙隴春陽動
散帙晴窗月色涼
浮世氛埃飛不到
分明一段輞川莊

題翠渠亭次韻

寒渠遶舍淨無埃
水上孤亭傍竹開
數載各因微祿去
今朝同載小舟來
閒聽啼鳥裁詩句
笑對青山酌酒杯
情景留人歸未得
隔林隨意晚鴉回

題延綠亭

無事頻將兔穎拈
披風抹月生虛簷
春回蘭蕙香浮几

雨過庭除翠入簾門外渟涵諸水滙天南依約數峰尖
箇中何物尤清絕滿架琴書一鶴兼

九日烏山登高次韻

白露凝霜催短景黃花泛酒續良遊山橫翠黛雲開處
雁帶斜陽天盡頭百歲光陰馳玉羽幾人名姓覆金甌
題糕且盡生前樂灑淚寧勞身後憂

又

浮雲漠漠擁遙岑不解為霖空自陰人事忽看今日改

菊花還着去年簪。廟堂誰是憂民者。畎畝空懷愛國心。
萬斛閒愁何處遣。盈樽美酒不辭斟。

送妻弟羅元吉之任汝州司訓

一鐸新持教汝州。西風話別岳溪頭。驪駒迭奏催行酒。
霜柳難將縮去舟。飛夢不離閩嶺月。橫經有待郟林秋。
清時莫歎長才屈。大手還修五鳳樓。

次張坦齋作廣化山水圖

誰寫雲山著。此僧王維去。後讓君能松庭鳥。下聞齋磬。

羅逕煙消見佛燈
春雨小溪流瀼瀼
夕陽孤塔影稜稜
看圖便欲離塵俗
共結茅菴紫翠層

春水和陳吉甫韻

積雨平湖水接空
混茫那復辨西東
長橋柳色澄深翠
斷岼桃花映淺紅
人喜蘭亭流玉笋
我懷沂水浴清風
幾回江上看湍急
直欲窮源路未通

感事偶書

拙心一片今猶昔
浮世多岐自町畦
巷伯謾勞傷貝錦

伏波誰與辨文犀從來山水知音少何怪雌雄過眼迷
賴有嬋娟天際月夜深還映小窗西

題三山施克明江湖覽勝卷

乾坤我欲徧經過世事參商柰老何夢遶洞庭秋水濶
心馳禹穴暮雲多晉陽謾想之推跡蜀道空傳李白歌
訪古知君多歷覽遺風還足重蹉跎

瑞州分司次壁間留題韻

星軺又是瑞陽城終歲奔馳笑此生山崦孤村藏竹暝

野塘流水入田平桑榆曉日千門影絃誦春風幾處聲
俯仰乾坤驚白髮百年心事竟何成

袁州道中

行邊文牘暫停披閒閱民風一賦詩白石煉灰施穰秬
青山鋤火種蹲鴟煙村桑柘通幽徑野店杉篁護短籬
聞說昌黎遺愛在千年尸祝有巖祠

自石城往寧都道中作

窮冬風露曉淒淒倦客何當息馬蹄山合忽疑前路斷

峰高翻覺宿雲低，丹楓翠竹攢幽澗。
綠蔓黃茅沒古蹊，謾說閩疆近相接。
故園千里望中迷。

題洪憲副文壇風月卷

紅燭青樽豈偶逢，十年同聽禁垣鐘。
豪談發處風生席，白戰酣時月映松。
應務羨君才獨裕，濟時嘲我術偏庸。
人生適意應為福，底用凌煙閣上封。

重過圓通寺借宿

欲濯塵纓尚未能，匡廬又見碧層層。
半生牢落空憐我。

一味清閒却讓僧周覽未酬霞外想獨吟聊伴佛前燈
重遊更與山靈約只恐萍蹤不可憑

重九同年戴大節諸君登臺賦詩病中示次韻
身如病鶴未能飛聞道羣公集翠微料得清樽能縱飲
肯教黃菊笑空歸山添新翠初經雨鴉帶殘紅待落暉
却憶去年多樂事故山傾倒卧苔衣

題張叔著桂林書院中曲水流觴次鄭東園韻
桂林風物擅幽奇此日追隨一憩之水有淵源流易滿

杯行詰曲到應遲
鶯調簧管來深樹
鱸切銀絲出別池
浮世茲遊須盡興
剎那間覺歲華移

題鎮海朱大尹漁樵耕牧圖次翠渠韻

乾坤何處是通津
謝却浮榮避俗塵
漁笛數聲芳渚暮
樵歌一曲碧山春
高秋禾黍徧層隴
落日牛羊歸四隣
架有琴書樽有酒
何須蓬島覓仙人

題林君叔孟秀亭

小亭新結傍幽溪
窗戶平臨翠篠齊
宿雨收殘山靄濕

浮雲飛盡海天低，樹連暉晚參差。
見花隱房櫳，只尺迷安得毫端生。
五色盡收佳景入新題。

南溪別業次韻

刺桐花下有華堂，別買溪南數畝庄。
旋剪荆榛開町疃，更添亭館帶林塘。
春嵐壓地苔花濕，暑雨蒸林荔子香。
自笑一生纓冕累，無緣來共白雲鄉。

寄華嚴寺默堂上人詩

乘閒特訪默堂師，何處遊方負所期。
林鳥潛窺山殿供。

野猿偷動石坪棋
碓收殘藥空流水
犬訝遊人吠短籬
欲問三生緣內事
相逢未卜是何時

又

萬木陰中梵宇開
分明人世有蓬萊
漾開池藻羣魚戲
點破松煙一鶴回
澗水浮花雲裏出
山風如雨竹間來
高僧不遇徘徊久
踏徧蒼蒼滿院苔

晚過涿州

青山冉冉夕陽浮
綠樹微茫見涿州
白雁聲寒燕塞晚

丹楓葉落薊門秋
漁舟蕩漾歸江浦
畫角淒涼起戍樓
黃帝蚩尤征戰地
眼前贏得水東流

日暮西山即事

晚風徐步水雲村
景物無端役客魂
霧擁碧岑螺髻濕
風生滄海雪花翻
潯州漁艇初歸浦
禧水人家半掩門
獨倚長松吟未就
梨花疎雨送黃昏

題坦齋所作小畫次周翠渠韻

孤艇斜陽外
羣峰紫翠橫
水光浮日色
蕩漾一川明

客中四時詩

花影隨日移鳥聲逐風度
索居元寂寥祇恐韶光暮
暑雨潤吟牋薰風清綠綺
新蟬欺客愁槐庭吟不止
荷落一池風菊開三徑雨
無窮離別懷况聽寒蟲語
飛雪透疎櫺隆寒襲重被
鄉心觸景生惆悵難成寐

黎嶺道中

古樹吼寒風危峰映夕照
對景獨傷懷厭聽哀猿嘯
翠壁瀉寒泉蒼林栖薄霧
日暮白雲深忘却闔關路

花發不知名水落石潭響山川爭秀麗吟餘足清賞
溪轉板橋斜峰回鳥道曲山泉最可人清音漱寒玉
斷霞橫蒼山淡煙迷遠樹草際幽泉生水凝如玉筋
花開不為春路濕非關雨空谷一聲傳山川學人語

題四景山水為林君叔孟賦

門掩青山盡日間紛紛朝市懶相干
交游滿眼知音少
笑拂瑤琴獨自彈

水邊亭榭絕炎熇坐對遺經日易消
載酒有人來問字

隔溪撐過木蘭橈

遊武夷九曲僭用文公韻

一曲呼來隔岸船
棹歌齊唱過前川
山靈似識遊人意
散盡峰巒遠近煙

遊西峰寺

林外應疑無路入
道傍惟見有僧迎
行行漸覺招提近
隔嶼時聞吠犬聲

停驂相與坐論文
又得浮生暫息紛
怪底襟懷清似許

僧房面面對松雲

六月十六日曉起

是月十九日立秋

浮生無計挽流光
歲月催人似箭忙
屈指又驚秋欲到
曉來微雨試新涼

感春

人喜春回我獨悲
化工雖巧亦還癡
陽光徧及閒花草
空谷幽蘭想未知

題雨竹并菊

雨過琅玕濕未乾
霜餘黃菊尚堪餐
他年何處偏思爾
紫陌雞聲旅夢殘

題孟浩然尋梅圖

瑤琴世路少知音
賴有梅花獨可尋
折取一枝良不俗
小齋聊爾伴清吟

送望江教諭伯清先生乃兄還莆

兩京飄泊幾星霜
却喜逢君話故鄉
潮水不知離別苦
又從江上送歸航

下阜雜詠

山徑荒涼月上時
門無剥啄鳥歸枝
道人引水澆畦罷
坐燎松明改舊詩

何處偏宜養性靈
無端野趣在林扃
開簾猶恨前隣樹
遮却遙山數尺青

春雨初過水滿川
神祠簫鼓正祈年
我來也欲隨風俗
急典春衣入社錢

一川桑柘隱煙霞
黃菊蒼松自一家
更喜舍南添隙地

開渠占斷白鷗沙

殘書讀罷啓房櫳
散步東風遣病慵
門巷條然籬落矮
隔林遙見夕陽春

蒼松黃菊纔三畝
流水柴門自一家
却悔平生都失計
坐聽官鼓踏霜華

世情得喪見交情
徑路蕭蕭草自青
惟有梁間雙燕子
年年依舊訪柴扃

墨竹為林信傳賦

籠蕊翠玉擅風標白石清泉伴寂寥安得伶倫裁鳳管
五雲深處和簫韶

金臺早行

數村行過始聞雞星斗依稀月滿溪遙想故園高卧穩
梅花影落小窗西

題扇面子猷訪戴圖

入夜懷人思不禁衝寒一棹度山陰興來歸去江雲暝
門掩千峰積雪深

春日卧病感懷

一卧經旬祇自嗟
無由散步樂韶華
東風似亦欺人病
吹落餅中數朶花

石倉歷代詩選卷四百十二

欽定四庫全書

石倉歷代詩選卷四百十三

明 曹學佺 編

明詩次集四十七

吳希賢

翰林同年繪像圖

丁丑冬臘月二日侍讀倪舜咨以同年官翰林者十二人咸萃京師無復雲樹睽違之歎乃合

燕玉河東之第且命工繪像各賦詩一章志之希
賢適自南至故有是作

歲聿云暮玉河之暎霰雪澄霽風日清妍君子有酒來
我同年

惟歲甲申聖人臨御風虎雲龍邂逅相遇登我諸友玉
堂之署

玉堂魏魏亦曰瀛洲十載登茲以遨以遊願言相勗無
忝前修

房杜既遠孰為我師協力同心惟王之毗云胡十載而
多仳離

如彼搏沙易渙以散今者具在式燕以衍獲菽米蕭逢
此歲晏

既擗爾管亦撫爾琴嗟我諸友東西北南言笑云云實
諧我心

元宵會謝鳴治宅得必字韻

京城重元宵釐火及明發士女喜以遊清歌遶天闕胡

彼風雪雱而有此蕭瑟陰晴固難定茲會胡可必行樂
須少年人生易華髮從此復何為且盡杯中物

上巳倪舜咨會甕山得木字韻

世路苦氛埃緬懷在山谷曉出西郭門珂馬紛相逐細
草迷舊津屢問煩僮僕小徑入湖陰穿雲過林麓僧房
霧露清石磴莓苔綠主人携酒至盤餐雜穀藪杯行既
已頻詩賦未能續逸思轉昏倦欲借藤牀宿歸驂不可
留夕陽在林木

馮珮之之江西督學和宮諭謝木齋韻

霜臺值春晚芳草都門多故人夙嚴駕欲別還相過感
時愧余拙黃鳥丘之阿正學久慕蕪異說紛蟬蛙西江
遠可涉帆影天一涯吾道皦如日此去將如何贈君錦
繡段聽君白玉珂鋤茅憶山徑濯錦夸天河願君更努
力洙泗多流波

水口遇宗弟廷隆

兄向江南還弟上金臺去水口一相逢離愁渺煙樹今

茲一邂逅留君留不住欲為回車輪暫慰我朝暮天意
復從人瀟瀟來夜雨

賞菊

宦居感流序嗟此菊有芳皎皎玉露白采采金花黃
冠裳集羣仙列宴瓊瑤堂黃流薦宮醴銀絲膾河魴華箋
灑元露佳句紛琳琅栗里自閒適竹林徒踈狂所以達
士飲顯允德足將流連不可極夕陽明遠岡酒酣壺矢
罷題詩對寒香

廣寒避暑應制

火雲閣日燒層空炎蒸六月處處同翠華詰旦出深殿
遠過霓裳仙子宮曰茲故是清虛府霧閣雲窗隔塵土
珠簾影動涼吹輕琪樹陰陰正亭午玻璃碗凍仙果香
行厨又薦崑崙漿太平不唱羽衣曲南風一闕諧宮商
紅爐萬國不可闢何時炎海回秋浸鋤禾田父苦塗泥
喝道行人思息蔭臣心感之良惻然願均此施蘇顛連
輿圖億載比喬嶽萬姓長歌堯舜年

題竹贈表兄徐齊紈庾使南歸

銀牀風起雪夢酣鷓鴣日暮啼江南江南秋意滿林塢
天仙握佩雲穆穆綬溪孫子壺南住平生賸有瀟湘趣
翠袖年來別恨多且拾琴書賦歸去故園到日秋色闌
相看喜有青琅玕珊瑚石畔坐涼月自把瑤笙招紫鸞
泠泠高興不可極人在瀛洲正相憶清風三徑莫教荒
會卜他年來借宅

水石菖蒲為林孟和作

滄江之波不盈掬小石稜層削寒玉曉露無聲墮古苔
九節靈苗為誰綠蘭橈去後汀渚空濛濛疎雨吹煙叢
回琴點瑟邈何許風味冷然誰與同舉世紛紛競穠郁
此草棄置無人錄粉署仙郎最愛之寫向茅齋伴幽獨
西風昨夜涼思多門前俗客稀經過銀箋翠管發佳興
喚起疊山同作歌

壺山四景圖

玉龍戰沒馮夷府敗甲紛飛世難數平湖兩岸松竹陰

等閒幻作玕琪圃丞相祠前孤月明熙寧橋下寒潮聲
此時城東老逋客小棹夷猶月上行一蓬春信梅花發
詩興凌凌清徹骨

郡城南面山水深依稀八面芙蓉峯山中花氣歛晴雨
春禽啼罷春雲陰雲兮無心逐風起片影孤飛過渠水
逶迤遙接城東樓萬里江湖望遊子橋梓坊前何日還
白髮婆娑歲云晚

翠壺之山凌碧虛層崖峭壁仙所居尋常秀色儘竒絕

况有晴雲時卷舒我昔攀緣出雲表決眦遐天衆山小
結廬擬向山中棲日日看雲聽啼鳥一朝雲起隨六龍
我亦乘之登九重為霖未慰蒼生望慙愧清朝恩數隆
只今還尋故山去淨掃雲軒與雲住

長河浩浩寒無潮夜風吹雪聲蕭蕭平明日出耀晴彩
萬樹瑤花猶未消湖南畫管松篁裏錦帳攬榆人未起
湖北朱樓翠幙深獸炭紅爐酌香醪竹籬茅屋是誰家
瓦鼎敲水自煮茶布衣當年冷似鐵蹇驢隨處吟梅花

笑渠富貴總塵俗一味清寒貧亦足

金臺別夢

仙舟今去吳江東吳江之水何溶溶美人遠隔芙蓉浦
伐木歌殘春思慵秋臺夜靜月如水紙帳梅花情萬里
夢魂幻作蝴蝶飛飛過瀛洲疾如駛瀛洲深處風景饒
美人相見還相招開樽共話十年事客窗風雨聲蕭蕭
好懷未罄忽驚覺景陽鐘動隣雞叫攬衣推枕起徬徨
滿地花陰殘月照

竹石雙清次吳鼎儀先生韻為太守拙戒兄題
吾家老兄好種竹昔年住在澄塘曲興來赤脚踏海石
明月清風過楚澤湘君憐爾抱雅材天吳紫鳳繽紛來
酒酣鼓瑟遺蒼佩鷓鴣飛下西日頽回看俗士甘軟美
此竹真堪與兄比夜窗風雨不知年客裏相逢故如此

梅花歌為禮曹吳以時作

暗風吹雪拂鈴索月色蒼茫照官閣閣前老梅花無數
開時偏近何郎幕瑤英滿枝那可辨鐵幹孤撐瘦如削

疎櫺度影見參差。薦地浮香驚噴薄。共言天工與真素。
坐使羣豪費吟嘯。吁嗟我生在閩海草堂住。近城東郭。
江鄉十月少霜霰。凍雨敲窗喧膈膊。是時陽和漏消息。
千樹垂垂齊破萼。仙妃香佩入娟妙。淵客明珠成錯落。
凌晨見之饒幽興。便促巾車走巖壑。溪南春色眩醉眼。
驢背詩聯滿行橐。邇來濶別十餘載。舊時蹤跡今何若。
夢魂勞勞過淮浦。歸思迢迢阻廬霍。亦知人事半良謝。
只有花開宛如昨。欲傍寒枝問春信。媿無健翼如鷓鴣。

長安驕兒愛桃李此輩俗眼難救藥主客中郎亦好奇
寫入新圖慰飄泊感君慷慨發孤咏造化無端歸索籥
還擬相從探春去市頭豫買雙芒屨匡時有願及早償
歲晚花前同引鶴

張克振歸順德

張君自是南海英風雲早歲搏鵬程杏園春事過十載
看花浪作儒生榮風雲滿面春衫碧客裏携書笑相覓
玉堂尊酒意未闌親舍孤雲愁轉劇西風吹衣歸興便

與君岐路齊揚鞭吳山越水路迢遞驚濤駭浪浮虛船
殘臘催人怒如渴到此躊躇復言別行程杳杳隨江鴻
鄉夢依依共明月高堂壽酒樂事多堂前雙桂春婆娑
天倫自分足怡悅功名休歎成蹉跎故山薇蕨君莫採
萬里青霄壯心在他年花發曲江春聽雨亭前重相待

族叔某之揚州司庾

竹林明月低僕夫戒行色馬上朝回未解衣携壺走送
城東陌紅塵十載飄客裾一官湖海誇新除公門無事

足行樂便道逢人多寄書
玉堂夜寒別思苦獨對孤燈
聽殘雨夢裏不識雲海深
夜夜相將過淮浦

烏山霽雪

銀屏酒醴凍不消
千山霽雪堆瑤瑤
曉來簷鵲報春信
梅花開到城東橋
城東詞客玉堂老
老眼摩挲詩最好
小窗呵筆賦新題
千古寒光照吟稿

送陳舜舉

銀燭高臺夜無端
別思新朝廷初試
士鄉國未歸人寥

落江南意優游濮上春冥鴻天咫尺京國是通津

表伯王靜甫南還

中歲悲行役高堂有老親亂山迷遠望歸路出通津樹
暗江城雨花明驛舍春故園萱草色應待遠遊人

贈人

離樽情不極歸路值深秋江晚楓如錦籬寒菊未金漸
看千里隔愁說二毛侵忠孝吾人事相期罄此心

姨夫鄭司訓山水

高士藏脩處而無車馬喧殘霞明島嶼芳草滿郊原黃
葉雲邊徑青帘郭外村此中有佳趣難與俗人論

又

千峰森玉戟萬樹綴瓊枝天上同雲後山中霽雪時梅
花東閣夢驢背灞橋詩獨有寒檀客談經坐絳帷

齋居八詠分得剪燭題

燒燭茅廬下長吟思不迷金盤落灰燼清影照羈栖風
度搖難定更殘刻漸低西窗千古意何夕重分題

挽林希哲

此日湖山路霜風玉樹枝頓成千古別不盡百年悲丹
桂秋香早青燈夜影遲嚴翁雙涕淚便是憶君時

送張養正都憲

先生原將種東觀早蜚英統制新銜命羗胡已識名豈
為投筆歎暫作請纓行沙草關南戍旌旗塞下營背人
時草檄入幕夜談兵文武真兼濟忠勤定有成戰袍團
繡鷹介馬梁朱纓意氣吞羣羯勲庸播兩京百年今故

典萬里此長城宵旰憂心泰邊陲指日清關張非俊傑
韓范本儒生佩得黃金印歸來謝聖明

陳師召之南京太常

歌罷驪駒更問程老逢離別倍傷情論交況是髫年故
結社須為晚歲盟蓬島天連鍾阜近容臺地並玉堂清
迂疎願得從君後欲挽仙舟且莫行

屠元勳之南京寺丞得何字韻

文學推君第一科紫金山色待經過相看盡道故人少

欲別應愁芳草多
列棘堂深新雨露
判花筆在足陽和
不知去住懷人地
秋水芙蓉隔幾何

陳伯敬分教黃岡

黃岡只在楚江頭
書劔憐君賦遠遊
歲晏乾坤雙短鬢
日斜湘沔一孤舟
春風講道臨芹水
夜月懷人上竹樓
北閣先生定相憶
應題尺楮慰窮愁

族祖靜軒之平陽巡簡

竹林斜月話匆匆
不盡離愁思轉蓬
書劔風塵今日別

江湖樽酒幾時同
寒城刁斗秋無警
平野禾麻歲自豐
去住相看情萬里
音書莫惜附鱗鴻

羅明仲歸省

看花同醉曲江春
眼底光陰幾度新
金匱寶文曾載筆
白雲親舍奈勞人
歸裝渺渺都門道
鄉思迢迢楚水濱
諼草堂前謾回首
紫霄高處是楓宸

丘安重下第

未得看花入禁林
橋門深處曳青衿
九重已放依親詔

半幅聊題惜別吟家在壺山煙樹底路歸寧海水雲尋
多情惟有溪頭月長照劉蕢愛國心

送上人還莆

十載關河雲水蹤忽驚春雨偃岩松傳來西竺千年法
歸聽南峰五夜鐘錫響吳山驚虎豹杯浮閩海護魚龍
題詩我憶曾遊處落日曇花意萬重

陳子學還莆

哺抱難忘從母恩東風愁思滿棠村清樽邂逅渾如夢

舊事淒涼豈忍言
天闕衣冠饒雨露
山城鐘漏自朝昏
徵求可遣庭常靜
況是金橋禮義門

李祥進士父南塘先生還東廣

已將忠孝語兒曹
歸去揚帆駕海濤
東郭柳條春後短
南塘山色夢中高
夜淋雷雨看龍劍
天路風雲憶鳳毛
酒債詩懷暫相引
恩封指日賁林臯

送李賓之墜馬

推敲直欲擅詞場
信馬那知墜馬傷
瓦碎定為資政戲

唇焦羞說校書狂走緘吏去惟求藥問病人來暫下堂
錯怪相思不相見芙蓉秋水滿芳塘

分題得卞將軍廟送李應禎中書

清溪兵合戰塵昏此日臺城厭楚氛一代風波成逆節
萬年忠蓋說將軍精魂夜雨歸何處古廟春苔掩夕暉
明到石頭拜遺像澤蘭汀芷有餘芬

送某歸省

九曲溪頭駐曉驂幔亭峰與碧雲參仙人宴罷風吹袂

客棹歌時月滿潭
綵屋虹橋成寂莫
澗花岩草自縑緜
此行為介庭闡壽
異棗如瓜可細探

李賓之歸省

早識茶陵是故鄉
扁舟三月過瀟湘
相定王臺下雪濤
壯賈誼宅邊煙草
長南澗蘋繁勞夢
想東風橋梓有輝
光逢人盡說玉堂
客年少無如此最
良

朱清之清江觜巡簡

清江巡簡大夫孫
此日承恩出帝閣
愧我中年厭離別

為君沽酒洗愁魂，城頭畫角天方曙。
沙上邏兵月正昏。
盡道為官莫尸素，班資高下不須論。

劉正郎山水圖

尚書公署有餘閒，時復披圖認故山。
交劔水清龍已去，衍仙堂在鶴猶還。
空林行迹荒苔畔，極浦帆檣落照間。
欲采蘋花涉江渚，西風雙鬢未垂斑。

題梅澗賀劉望脩父受封

藤橋橋外清溪畔，應是孤山處士家。
舍北梅花渾綽約。

歲寒風雨亂交加
壺中香露春長在
鏡裏流光鬢未華
更欲驂鸞上天去
仙郎已駕五雲車

蘭

空谷有幽蘭久矣無人識
君子來不來日斜思如織

寄余汝盛

見月念故鄉愁緒縈心曲
目極閩海南天低煙樹綠

山水小景為張同禹題

江山渺何許此別難留住
漢水遶襄城千里孤舟去

東張同禹

木落楚江晚，渾無一紙書。
白雲隨望眼，還似別離初。

題天龍菴

白雲西畔是天龍，醉眼摩挲認舊蹤。
他日青山賦招隱，隔溪流水數株松。

野航

半世高情付野航，渚雲沙鳥此徜徉。
晚來亭館疑無路，秋在蘆花月似霜。

錢太醫山水圖

灩灩溪流剪剪霞夕陽浦口白鷗沙美人只在滄洲上
只尺相看隔藕花

讀明妃曲

馬上琵琶淚眼枯黃雲沙磧隔單于從來妖艷傾人國
在漢何如遠在胡

四景翎毛

露濕湘桃色更殷枝頭啼鳥曉風寒數聲隱隱穿花去

惆悵傷春人倚欄

凍雀聲中梅正花
春風入夜著山茶
怪來巧鳥多情思
白雪梢頭醉絳霞

牧牛圖次周鶴洲韻

菰蒲深處鳥呼羣
溪上蹄涔路不分
日暮調禽忘歸去
西山松火暗秋雲

詠梅送熊通政

江南草色別來久
夢繞梅花思不禁
何似拂衣歸去好

小齋明月夜橫琴

林邦賢山水圖

流水平沙江路遙，抱琴聊爾一相招。
知君故是清狂客，春韭香時每見邀。

題菊送弟希達

漂泊那知在異鄉，故園秋菊幾番黃。
酒酣索筆還題畫，珍重相期晚節香。

夜明簾

合浦珍珠光照夜結為簾幙價連城玉鈎不上黃昏後
十二瓊樓月倍明

鸚鵡

榻外松花午夢香喚人鸚鵡綠羅裳
襖銜去後誰能賦
隴樹愁雲幾斷腸

石倉歷代詩選卷四百十三